



Tir Yimiyim



www.tiryimiyim.in
Regd. No. RNI. NAGAAO/2004 / 13113. Postal-NE/RN-717. e-mail : tiryimiyim@gmail.com

TAPAK 8 Yangia anidakangma : Tir Yimiyim tiryimiyim@aolima tir yimiyim TAPAK 7

Para-Badminton: Joshi-i Gold; Pramod-i silver 2 angu

Northeastern Australia tsumetsung agi kanga mejungi kongshir lir



VOL. XXI NO. 72 (ADOK 72) DIMAPUR SANGTENNÜ (TUESDAY) LUCHII (DECEMBER) 19, 2023 ₹ 5.00

Gari lendong nung nisung 4 asü; 3 yiru

Dimapur, December 18, 2023 (TYO): Hombarneep Assam kübok Silonijan anasa gari lendong ka nung nisung pezü asü aser asem yiru. Tasürtem rongnung tetsür asem dena liasü. Gypsy (Nagaland registration) gari ka nung nisung 7 mener Dimapur nungi Mon-i aodang Thar jeep (Assam registration) gari ka den tsüktep. Idangjisa nisung ana asü aser ana mozü kidangi anir aodang len tom nung asü. Iba lendong nung yirur nisung asem ya Dimapur hospital nung anepaludar.

“Tasürtemji N. Langphong Konyak (35 M) (Driver), Neangmei B Konyak (33 F), Nyamshan (26 F) aser Ngapya (27 F) nunger ta jangjaogo aser yirua alirtemji Atai Konyak (25M), Kaihong Konyak (20 M) aser Angluh Konyak (15 M) nunger lir” ta SDPO Bokjan, Rustom Brahma-i ashi. Mahindra Thar anisangji Ratul Basumatary ta jangjaogo ta Brahma-isa ashi. Gari kanga kara aniba ajanga lendong atalok asütsü akok ta paisa ashi.

Assam aser Nagaland CM temi Amit Shah den ajurutep

Dimapur, December 18, 2023 (Agencies): Assam aser Nagaland Chief Minister nati Hombarnü Union Home Minister Amit Shah den ajurutepogo. Tanü Assam CM Himanta Biswa Sarma aser Nagaland CM Neiphiu Rio nati Amit Shah den par kidang ajurutep aser idangji state ana tsüingda arrtsü ken o aser tanga onüktem benoka lemsatep. Northeastern region nung yimjung aser terenlok bener aruba nung Amit Shah-i shilem tajung agiba atema Chief Minister anati pelaba lemsatep. State ana tsüingda arrtsü ken o angatettepsü aser ano state ana

dak sendakba onüktem parnoki jemi ta sorkar sangdong ka ajanga metetdaksü. “Assam CM Himanta Biswa Sarma den külemi akhümsümbua aliba Union Home Minister & Minister of Cooperation Amit Shah den ajurutepogo. Pai Nagaland aser Northeast region ajunga nung yimjung aser terenlok bener arutsü süoki ia bilemba aser inyakba atema pelar” ta Nagaland CM Neiphiu Rio-i metetdaksü. “Tanü New Delhi nung Union Home Minister Amit Shah aser Nagaland Chief Minister Neiphiu Rio na den ajurutep” ta Assam CM Sarma-isa metetdaksü.

Mokokchung nung Winter Carnival 2023 tenzükogo

Mokokchung, December/ Luchii 18 (TYO): Town Square(Police Point) Mokokchung nung December 18 aonung 4th Mokokchung Winter Carnival 2023 tenzükogo. Yisu asoba benjungmung amungba den külemi 4th Mokokchung Winter Carnival 2023 Adventure and Motorsports Association of M o k o k c h u n g (A M A M) ayongzuka taonung nungi kadagi aser iba carnival ya December 23 tashi aonungshia 5:30 Ako nungi 9:30 ako tashi akatsü sentongtem tatongi renema lir. Taonung iba Winter Carnival tenzüksür Comandant, 12 Assam Rifles, Mokokchung Shri.Rahul Gurung KC liasü aser pai sentong tenzüksür kelen mapang tatsüka agia jembidang Mokokchung nung iba ama benjung akaba ajanga tangari Mokokchung meteta akumer aser iba ama benjung akaba ajanga alima nung tesünep, yimjung aser telungjem adokdaksürta ashi. Comandant, 12 Assam Rifles, Mokokchung-isa Mokokchung nung iba carnival lapokba ajanga lanurtem aikati tsürabur dang sen memeshi-i pei sasa aahzüksü lenmang meteter aser ibaji pamok

lanurtem takum tepeyong asoshi temoatsü tulu lirta ashi. Iba ama benjung nung lanurtemi shilem agiba ajanga panoki pei sasa meranga inyaka chiyungtsü angazükerta Comandant, Shri.Rahul Gurung-isa Adventure and Motorsports Association of Mokokchung teloki lanurtem nem sabang tajung lapoktsüba asoshi tepelaba olen ka metetdakja liasü. Kasa sentong nung salem osang ADC & Administrator Mokokchung Municipal Council Chumlamo Humtsoe-i salem o jemi aser AMAM President Moasashi jamir-I tarur pela agizükba o jemi, Hailinator ajanga temeja ken ka aten aser 12 Assam Rifles teloki pipe Band Display agi aser sentong nung Tsüngrem lenisüba jazüka Asso.Pastor MTBA Monglir-i sarasadem aser Ajungla Longchar ketdangsuba nung iba sentong ania liasü. Taonung nungi tenzükaga hapta tepeyong December 23 aonung tashi iba carnival sentong akadang telok balalai ken atentsü,iba den chiyungtsü balala ayoktsü asoshi stalls-tem lapoktsü aser tanu kazütsü asoshia tajung renema lir.

Covid putetba mapang Centre-i yimra agi shirangba osang lemsatepsü tuyur

New Delhi, December 18, 2023 (Agencies): Linük nung yimra mesükba shirang aser Covid kanga putetba agi Hombarnü Centre-i state ajak dang tenük yoktsü aser osang sangoktsütsü metetdaksü. Centre-i state sorkartem dang Influenza-like Illness (ILI) aser Severe Acute Respiratory Illness (SARI) osangtem sangoktsütsü shiogo. “Covid-19 virus maneni prokshir aser India tsüingsang-mopung den kanga peta lir anungji asenoki district jenjang tashi nung Covid tena teti mita alitsüla” ta Ministry of Health-i ashi. “RT-PCR tests agiang aser genome sequencing atema Indian SARS COV-2 Genomics Consortium (INSACOG)

laboratories dangi positive samples yokang. Yamaji asü nung dang linük nung variant tasentem metettsü” ta Centre sorkari ashi. Tanü tashi nung India nung Covid puteta anepalur nisung 1,828 lir. Ajsüaka Kerala nung Covid puteta alir ka asü. “Covid puteta alir ka asübaji subvariant ajanga masü saka temang nung tanga timtemtem ajanga asü” ta INSACOG ketdangsur Dr NK Arora-i ashi. “INSACOG-i tensa jungjunga repringdar aser virus asadangdar” ta pai ashi. Benjung mapang atonger anungi nungdakba public health measures alitsüla aser tashidak mebelenshi atema inyakyimtem tenzüksüla ta INSACOG-i metetdaksü.

Tango sashiba dak sendakba shirang kanga prokshiba aser aser JN.1 Covid sub-variant putetba mapang World Health Organisation (WHO)-i virus melenshir anungji linüktemi jungjunga mita alitsü aser osang lemsatepsü metetdaksü. Kerala nung Covid-19 subvariant JN.1 putetba sülen CM Siddaramaiah-i aniba Karnataka sorkari arishi küm 60 ser temapurtem mask enoktsü tetuyuba agütsü. “Covid-19 subvariant JN.1 mesükba shirangertem test asütsü tenzükogo. State sorkari Kerala den arrtsütepa aliba district tem nung surveillance akangshio” ta Karnataka health minister Dinesh Gundu Rao-i ashi.

JKTM tenteter küm 75 ajungba platinum jubilee amonger



Mokokchung, Decemeber 18, 2023 (TYO): Jangpetkong Kaketshir Telungjem Mungdang (JKTM) tenteter küm 75 ajungba platinum jubilee sentong “Mita Yanglushidi” omen dak rangloker Dec 18 aonung nungi tenzükaga Alongkima nung mungdaki. Taonung jubilee sentong lapoktsür 29 Jangpetkong Assembly Constituency MLA aser Advisor for Transport, Technical Education, Temjenmenba-i jembidang, loktiji yanglushidi ta süra mezümbuba pei taküm khen meyipa repringshitsüla aser lokti melenshitsu asoshi asenok nisung tajung kaka akümsü merangtsüla, ta ashi. Tanü technology ainba den külemi alima melenshiba ajanga asen taküm nung temelenshi aser tebilemsü aika ajurutsü, anungji, iba mapang asen tsüraburi sayuba taküm jenjang (life values)-tem aser asen teyanglur Tsüngrem mamatoktsü pai kaketshirtem ajungshia liasü. Tarutsü nung asen lokti samaa maotsüsa asen tsüraburi

sayuba taküm jenjang – kati ka akümsütepeba, pei tetsü oshi, aser asenoki benshia aruba sobaliba aser yimsüyimbong balalatem rizünga ayutsü asoshi paisa ayongzük. “Ya lanurtemi kanga aroka agitsüla”, ta paisa shisem. Küm shia tazüngertem teimba teimba akümer saka sorkari sorkar mapa yamaji sütepa magütsüteter, sorkar mapajia nungdak saka private sector nung temulung agütsütsüla. Taoba mulungsentsü melenshir lanurtemi tensa den apet aser alimai nungdakbatem meteta azüngtsüla/angazüktsüla. Tejangraba den temulungtetba aser meranga azüngba den Tsüngrem dak teimla ayutsü asoshi Dy. Inspector General of police (Trg), Imnalensa IPS-i tajungshi o jembidang ayongzük. Iba sentong nung Ao kaketshir Mungdang (AKM) tir - Lanutoshi Aier, Jangpetkong Senso Mungdang tir - Purtoshi, JKTM tir – Alemsashi, JKTM tongti zülur – Imliakum, taoba JKTM tir – L. Purtoshi, taoba JKTM tir

– Lendilong, Alongkima Adhoc Town Committee Chairman – Imtisunep aser tangartemi shilem balala agia liasü. MLA & Advisor, Imkongmaria mapang tatsüka agia jubilee salem o lemsatep. Alongkima Town Students’ Union-i jubilee lapoktsü aser Luyong Kaketshir Telungjem-i ken tajung ka aten. Iba sentong nung Chungliyimsen Baptist Arogo Pastor, Lanunungsang den temoatsü meshia sarasademer tenzük aser Molungyimsen Baptist Arogo Pastor, Rev. S. Tajung den tenüngsang agüja sarasademer sentong tembanga liasü. Kaketshirtem sempet salaba sentong balaka agia liasü. Iba sentong Dec 19 tashi alitsü. Anepdang sentong nung Nagaland Legislative Assembly, Speaker, Sharingain Longkumer tetushi tesemdanger asütsü jaoka lir. Sentong balala ana nung Kohima Ao Baptist Arogo Pastor, Arep Tzüdir aser Dept of Agronomy, NU, SASRD, Medziphema, Dr. L. Tongpang Longkumer nati tongti o jembitsü.

NIMSR nung Viksit Bharat @2047 seminar agi



Kohima, Luchii/December 18 (TYO): Nagaland Institute of Medical Science & Research (NIMSR) nung December 18, 2023 nü Viksit Bharat @2047 indang seminar ka ayongzüka liasü.

Iba sentong nung shilem agia MBBS azünger par trok-i tejakleni aoba linük ka nung empowered Indians (Education, Health, Sports, Nari Shakti, Caring Society, Culture), Thriving and Sustainable Economy (Agriculture, industry, Services,

Infrastructure, Energy, Green Economy, Cities), Innovation, Science & Technology (Research & Development, Digital, Startups), Good Governance and Security, Religious Tourism amala onüktem nungi jembia liasü.

Linük yimchijung asoshi lanurtem mangdang tajung ayuba atema Director-cum-Dean of NIMSR, Dr Shoumya Charaborty-i tenüngsang agüja liasü.

"Asenok dangar den sako dang masü saka ajak dang

tajungba asütsüla," ta lai ashi. Lanurtemi mapa tajung tenzüksü asoshi ibai ka lir, aser iba ya ajanga India ya tashi tait linük ka akumtsü, ta NIMSR nung Assistant Professor, Longna Konyak-i ashi.

Viksit Bharat@2047 ya 2047 tashinung India ya developed nation ka akumtsü Government of India indang nükla ka lir.

Iba nükla nung lenla balala nung terenlok, rongsenketzüng ainba, lokti tejakleni aoba, environmental sustainability aser junga yimsü asüba dena lir.

Chümoukedima Tourism Logo & Tagline Design yangluteptsü

Dimapur, Luchii/December 18 (TYO): Nagaland State Tourism ajanga Ministry of Tourism Swadesh Darshan 2.0 den lungjemer Chümoukedima Tourism Logo aser Tagline Design Competition 2023 sangdongogo.

Tagline atema talenba yamai alitsü:

- Taglines ya ojang trok dang talangba masütsü.
- Taglines ya English nung dang asütsü.
- Shilem agirtemi original tagline phrases dang agütsütsüla. Danga nung tang tamshidak tagline agütsüra magizüksü.
- Tetoktepba nung taglines agütsüba ajak Copyright tem Department of Tourism, GoN meyong asütsü. Logo atema talenba yamai alitsü:
- Logo designs ya 10cm x

10cm bo asütsüla aser landscape orientation nung 21cm x 14.8cm (A5 size) dang tuluba masütsüla.

- Logos ya tabu asem nung agütsütsüla: Ana sentsü balala nung aser ka sentsü tanak aser temesüng nung.
- Shilem agirtemi logo original dang agütsütsüla.
- Midjourney mesüra stable Diffusion ama Generative Art tools nungi yangluba logo tem magizüksü.
- Logo tem ya MS Paint, Adobe Illustrator, CorelDRW, Procreate, Adobe Photoship ama digital platform nung yanglutsü akok. Item platform nung yangluba logo ji resolution tajung nung asütsüla aser noksa meraksatsü mechi 300 DPI dang tajemba masütsüla.
- Logo tem ya websites ama digital media/Facebook aser

Instagram ama social media aser brochures, magazines, hoardings, leaflets, souvenirs amala printed promotional material nung amshitetsüla yanglutsüla.

Takok angurtem official Nagaland Tourism website aser social media pages mesüra local newspapers nung adoktsütsü. Takok angur nem Digital Certificate agütsütsü.

Jangra alirtemi pei entries nung tenüng, arishi küm, mobile number, talidak tesem aser pei inyakba mapa/kaketshir indang tejangja chumud2@gmail.com dangi mail yoktsüla.

Item taglines aser logo design ya December 31, 2023 nikongdang 5:00 ako tashinung agütsütsüla. Iba dak sendakba osang tali tejangjaba metettsü asoshi Chumoukedima.nic.in nung angutsü.

Tripura police-i ganja shibelener ana apu

Agartala, Luchii/December 18 (TYO): Agartala nungi New Delhi tashi sofa sets nung sen lakh 25 jenjang ganja shibelener aotsü merangba mapang Tripura Police-i Churaibari nung Assam nungi nisung ana apu.

Churaibari ya Assam-Tripura arütsü nung lir.

Temesepba mozü shibelenba azüoktsü mechi Tripura Chief Minister, Prof. Dr. Manik Saha-i Nala points 16 amenokba ajanga takok jenti angur, ta North Tripura District Superintendent of Police (SP), Bhanupada Chakraborty-i ashi.

Osang tejangja angazükba nung ajemdaker police temi container truck ka meita bushiba mapang sofa set nung miima aliba ganja (cannabis) seret 150 ngutet.

Iba dak sendakba nung Bongaigaon, Assam nungi Mujibor Ali aser Jahangir Alam apu, shirnok Delhi nungi Agartala lenia oa liasü.

Temesepba mozü shibelen temi yimya aser tasa balala amshiaka Churaibari nung teti meita aoba ajanga item mapa tamajung nokdangteter, ta SP ajanga ashi.

Assam Rifles-i state nung sentong balala ayongzüük



Dimapur, Luchii/December 18 (TYO): Assam Rifles temi

nüburtem asoshi maneni mapa tajung inyaka Akhen village nung steel pipes 100 lema agütsü. Iba yimtsüng nung pipeline junga maliba ajanga nüburtem tziü agi kanga anünga liasü. Item pipes agütsüba ajanga nüburtem anogoshi nüngdakba tziü tajungba angutsü. Iba pipe lema agütsüba sentong nung yimdaklir aden aser parnoki Assam Rifles tem dang pelaba lemsatepa liasü.

Nüburtem den tesendaktep tajungba yangertsü nükjidong nung Assam Rifles temi Akhegwo COB kübok yimtsüng pongu nungi lenirtem den chiyongba sentong ka December 18, 2023 nü ayongzüka liasü.

Iba sentong nung Akhegwo aser anasa aliba yimtsüngtem nungi lenirtem adenshia sensaksem tajung kaa region nung terenlok asoshi

jembishinüa liasü.

Iba ya ajanga Security Forces aser nüburtem tsüngta tesendaktep tali akangshitsür.

Maneni Assam Rifles temi December 18, 2023 nü NCC Cadets of 1 Nagaland Girls Battalion atema "Health, Hygiene and Nutrition" onük nung awareness lecture agüja liasü.

Iba sentong ya Greenwood School, Kuda Village, Dimapur nung ayongzüla liasü, kong NCC Cadets 500 shi dena liasü.

Iba sentong nung temang anema alitsü asoshi mürekmeju yimya balala den chiyongtsü shidak achi-ajemtsü indang sayu.

Cadets tem dang tziü nungi tashidak balala adokba, aser temang nung vitamins aser minerals nüngdakba indang sayua liasü.

Assam Rifles temi iba ama sentong tajung ayongzüka atema NCC Cadets aser staff temi pelaba lemsatepa liasü.

SON pur Special Christmas 2023 mungogo



Dimapur, Luchii/December 18 (TYO): Yisu Khrista asoba bilemteta Special Olympics Bharat-Nagaland (SON) pur Special Christmas 2023 munga liasü.

Iba sentong nung DABA Associate Pastor, Toshi Longkumer-i Tsüngrem o jembia aser Tovili Assumi-i sentong

tembanga sarasadema liasü.

Iba sentong ajanga special athletes, coaches, züngsem, tsürabortem aser temulungertem lungjemdaktsü. December 16, 2023 nü iba benjong ya Dimapur Ao Baptist Arogo (DABA), Duncan nung agia liasü.

Iba sentong nung kentenba,

tsüngsangba, sempet balala alemba, Lai azüngba aser asaya tabu balala den Christmas chiyong chiyonga liasü.

Kija aser lokti tentet balalai yariba aser DABA ajanga tanen makai yaria tekülem ki amshidaktsüba atema kanga pelar, ta SON sangdong ka ajanga ashi.



Tribal Old Age Home cum Day Care Centre, Thilixu Village pur Advent Christmas sentong December 17, 2023 nü agia liasü. Iba sentong nung o jembir Kenie Kiso, Pastor, Life Square Church liasü aser tesemdanger tongti Seyiekhrietuo Solo, EAC Seithekima liasü. Iba sentong nung teintet rogo temi ken aten aser Ivukhu Chisho ajanga shilem balaka agia liasü. Kasa sentong nung rescued senior citizens kari takum kuli agütsü aser TOAHDC Director, Imlitongzuk Amri-i 2023 osang lemsatepa liasü. "Mission with a vision" omen kübok teintet rogo 100 nem sempet aser saradem agütsüba mission ka tenzüka liasü. Iba sentong nung adenerem Christmas chiyong chiyonga liasü.



December 18, 2023 nü Ranchi nung Jharkhand assembly tagidak mapang BJP MLA temi Congress MP, Dhiraj Prasad Sahu anema longkak aitdang tangokba noksa nung angur.

Election sülen ang INDIA teloktep nungi PM candidate shimtsü: Mamata

New Delhi, December 18 (Agencies): Hombarnü Trinamool Congress tongti lenir aser West Bengal Chief Minister, Mamata Banerjee-i, 2024 küm Lok Sabha election agiba sülen ang INDIA teloktep nungi Ato kilonser candidate shimtsü, ta metetdaksü.

Mamata Banerjee-i, INDIA teloktep nung aliba party temi menden lemsar tokteptsü aser BJP tamakok ngudaktsütsü, ta metetdaksü.

India tesem ajaklen, talisa Hindi oshi bulua jembiba state tem nung BJP jenjang kanga junga akümba dak sendakba tasüngdangba ka langzüdang Mamata-i, "BJP tashitait masü; onok tashimait masü. Ibaji koktettsü atema onoki longjemmer inyakttsü nüngdak," ta ashi.

Laisa, "Nibo Hindi oshi bulua jembiba region aser tanga regions mebendanger," ta ashi.

Lok Sabha aser Rajya Sabha naprongla nung

Oppositon MP tem aika anentsüba dak sendakba nung lai, "Iba ya ajanga BJP tetsübu sayur. Parnok majority liaka parnoki tsübur. Nüburtem ola nembangtsür. Iba ya democracy ashioktsüba lir," ta ashi.

TMC MP, Mahua Moitra MP nungi anentsüba dak sendakba nung lai, "Ni maneni la pusemer aser la menden (Krishnanagar Parliamentary) atema party-i telemtetba agitsü," ta ashi.

NIA-i state pezü nung tesem 19 mita aodang nisung 8 puogo

New Delhi, Luchii/ December 18 (Agencies): India nung ISIS kiralongra asalentong anema Hombarnü National Investigation Agency (NIA)-i Karnataka, Maharashtra, Jharkhand aser Delhi nung tesem 19 mita aodang nisung 8 puogo.

United Nations-i ISIS ya kiralongrar organisation ka, ta sangdonga lir.

Kiralongra ajungkettsüba mesüra kiralongratsü atema asalentong yangluba dak sendakba nung NIA-i Minaj 'alias' Md Sulaiman densema nisung 8 puogo.

NIA-i sangdong ka ajanga, parnok apuba ajanga kiralongratsü aliba, talisa IED bomb amshia amaktsü aliba sentong raksatsüogo, ta

metetdaksü. NIA-i Karnataka kübok Ballari aser Bengaluru; Maharashtra kübok Amaravati, Mumbai aser Pune aser Jharkhand kübok Jamshedpur aser Bokaro aser Delhi nung tesem kar mita ao.

Mita aoba mapang NIA-i bomb yangludang amshiba oset kar apu; item oset rongnung Sulphur, Potassium Nitrate, Charcoal, Gunpowder, Sugar aser Ethanol densema lir.

NIA-isa techira hadir kar, sen, tashishitsü documents, smartphones aser tanga digital oset balala puogo, ta parnoki metetdaksü.

NIA-i apuba nisung tiji Ballari nungi Minaj aser Syed Sameer na, Mumbai nungi Anas Iqbal, Bengaluru nungi Mohammad

Muniruddin, Syid Samiullah 'alias' Sami aser Md. Muzammil, Delhi nungi Shayan Rahman 'alias' Hussain aser Jamshedpur nungi Mohammad Shahbaz 'alias' Zulfikar nung lir.

Islamic State mesüra ISIS ta ajaba telok ya al Qaeda telok nungi jakzüka 2014 küm tenteta liasü. IS teloki Iraq aser Syria na nung tesem aika atsünga agiba mapang alimai iba telok meteta aküm.

United Nations densema linük aikati ISIS ya kiralongrar organization ka aser meimchir temeden anema inyakba telok ka, ta sangdongogo.

Iba dak alia Middle East nung Muslim nung lenirtema aikati IS-i Iraq aser Syria na nung inyakba mapatem aija liasü.

Lok Sabha nung MP 33 aser Rajya Sabha nung MP 45 anentsüogo

New Delhi, Luchii/ December 18 (Agencies): Hombarnü Rajya Sabha nung MP 45 aser Lok Sabha nung MP 33 anentsüogo; tamalen-a opposition MP 15 anenja liasü, anungji ibaji densemabo House ana nung MP ajak senteper 92 anentsüogo.

Hombarnü Lok Sabha nung anentsüba MP tem rongnung Congress lenirtem- Adhir Ranjan Chowdhury, Jairam Ramesh, Randeep Surjewala aser KC Venugopal nung densema lir.

Parliament nung rongrong adokdaksüba atema asükwa mongpu Parliament senden piyong atema MP tem anentsür.

Hombarnü anentsüba MP tem rongnung parnok 11 bo Privileges Committee nem agütsüogo, anungji report magütsü tashi parnok anenja atatsü.

Tamalen Lok Sabha nung MP 14 aser Rajya Sabha nung MP ka anenja liasü. Tamalen Lok Sabha nung anentsüba MP tem rongnung Congress nungi parnok 9, CPM nungi ana aser CPI o DMK na nungi MP kaka densema lir.

Hombarnüa Parliament House anaprongla nung opposition MP temi tawa Parliament nung security raksaba atema Union Home Minister, Amit Shah-i sendeni arua telangzüba agütsütsüla, ta takhangba agüja rongrong adoka liasü.

Osangbener den jembidang Chowdhury-i, "Ni densema lenir

aika anentsüogo. Anogo aika onoki tamalen anentsüba ozü MP tem tanaben agizüktsü takhangba agütsüba den külemi Home Minister dang sendeni arua sangdong ka agüjang ta takhangba agütsü. Anogo shia pai TV sentongtem nungbo jembir saka Parliament nungbo tera dang jembir," ta metetdaksü.

Union Minister, G Kishan Reddy-i, "Opposition MP temi tim masüba yimya benshiba agi parnok anentsü. Opposition atema tongtibang onük kecha mali mesüra Ato kilonser Modi-i aniba sorkar anema benoktsüsa onük kecha maliba agi parnok koda mesüi senden magitdaksütsü atema inyaker. Anungji Speaker-i parnok anentsü aser onokia ibaji pusem," ta metetdaksü.

December 13 nü Parliament nung security raksaba tatalokba dak sendakba nung House anaprong- Lok Sabha aser Rajya Sabha naprongla nung Opposition MP temi Union Home Minister, Shah dang Parliament-i arua linük nung building tajungtiba nung koma ser security raksaar telangzüba agütsütsüla, ta akhanger.

Congress MP, Gaurav Gogoi-i, "Union Home Minister Amit Shah-i Parliament telungi aita o jembitsü atema tsübur, ibayongji pai osangbenertem den ang jembir. Iba ya Home Minister atema tenüng menük lir, kechiyong pa kübok democracy tekülem ki amak," ta aitsü.



December 18, 2023 nü Bhopal nung Madhya Pradesh assembly senden mezüng anogo nung Madhya Pradesh Chief Minister Mohan Yadav-i Pro-tem Speaker, Gopal Bharagava agizükdang tangokba noksa nung angur.



December 18, 2023 nü New Delhi nung Rajasthan Chief Minister, Bhajan Lal Sharma den Deputy Chief Ministers- Diya Kumari aser Prem Chand Bairwa nungeri linük tatong Tir, Jagdeep Dhankhar ajurudang tangokba noksa nung angur.

Excise Policy ken o dak sendakba nung ED-i Delhi CM Kejriwal jaoker

New Delhi, December 18 (Agencies): Tamalen Delhi nung excise policy indang senotsü ochimashi ken o dak sendakba nung Enforcement Directorate (ED)-i asüngdangyatsü atema December 21 nü Delhi Chief Minister, Arvind Kejriwal jaokogo.

ED-i November 2 nüa Kejriwal jaoka liasü, ajisüaka pai ED matsüngdangi mao.

Excise Policy ken o dak sendakba nung Prevention of Money Laundering Act (PMLA) ozüng kübok ken o angadangtsü atema ED-i maneni pa jaoker.

Tamalen 2021-22 kümsük atema Delhi sorkari benokba excise policy kübok yi shishilebartem nem licenses agüja liasü, ajisüaka iba licence atema sübokrem agi ta tai tonglokja lir, ajisüaka Aam Aadmi Party (AAP)-ibo parnokia aibelena mali, ta ashir.

Excise policy agenba sülen iba ken o bushisüngdangtsü atema Delhi Lieutenant Governor-i benoka liasü. Iba sülen Enforcement Directorate-i PMLA kübok ken o ka benok.

Kasa ken o dak sendakba nung tamalen Delhi minister ana/ AAP lenir ana- Manish Sisodia aser Sanjay Singh nabo pua lir.



TIR YIMYIM

YIMOBILEM (EDITORIAL)

DIMAPUR SANGTENNÜ, DECEMBER (LUCHII) 19, 2023

Khristmas nung firecrackers mepokli

- P Tiamongba Aier

Küm ishika tejakdang iba kasa sabang nungi Naga nunger dang Khristmas mapang firecrackers mamshitsü temepishiba olen ka sangokja liasü saka kümtem süia arudang tsümartemi parnok benjungbentsü nung apokba dang nungibo Naga nungeri ang Khristmas nung firecrackers teimba pokyonga aruba nguogo. Iba jagi taküm-a Yisu Khrista asoba anogo tonga arudang kasa temepishiba sangoktsür kechiyong tesüngiem aonung ka nung ang asen Kümtekdakba sodaktsünür. Asenoki "Temeshi, Tesüngiem, Sentsüprang aonung ka.... Süngjema mejanger, Süngjema mejanger..." ta Khristmas ken atener saka tanübo iba ken den meputepi Khristmas amonger. Asenoki Khristan yimsü agizüka amangtsü tenzükba sülen nungi Yisu asoba benjung ya kanga metsüngareta mongyonga arur aser arogo ajak nung sentong tajungtem yanglua benjungteper aser kinü Yisu külemer. Ajisüaka, tanü Naga loktiliba nung Khristmas amongba repringdang nung, nisung aikati Yisu asoba benjung ta asüba tu amadoker mongteper ama ajiteter. Tanü asenok Naga nunger aikati Khristmas ya tanela nung masü saka shi jangraba nung dang amonger aser asenoki meinyakdangi mesüra mebenshidangi aruba sobaliba tamajungtem ajizüka benschir. Sobaliba mesüra inyakyim tamajungtem ta süra, temesepba achi-ajemtsü agi leter longsolongbenba, sentepi moi tanga sentongtem nungang mapang endokba, aser tongtipangbaji tapoktsütem (firecrackers) amshiba lir. Item sobaliba ya asen Khristan yimsü den khenyongi meputep aser Laishiba tetuyubatem anema lir. Kechiyong Laishiba ajanga asenok dang temesepba chiyungtsü nungi pilaa alitsü tuyur, Tsüngrem külemtsü tuyur aser süngyanglutem mekülemtsü aser süngyanglu külemertem jilu mebenshitsü aser shi jangraba mapatem meinyaktsü tuyur. Saka tanü asenoki jungjunga shidadangra, Naga nunger aikati Lai O tesayubatem tashi mangar aser alima nem kokdaktsür Khristan ka ama libaliro meliteter. Tanga ajakji toktsür asenoki sobaliba tamajung ka benshiba tapoktsütem (firecrackers) amshiba lir. Nagaland nung Khristmas mongyonga aruba meyipa repringdangra, "Temeshi, Tesüngiem, Sentsüprang aonung ka... Süngjema mejanger, Süngjema mejanger..." ken den khenyongi meputepi amongba nguogo. Tesem kati ao nung tapoktsütem apoker, ano külenia odang nung kasa dang tapoktsütem apokba ola angashir ta tamangertemi Khristmas amonger. Iba sobaliba ya shinga dang nungia masü saka tzümartem, talisa süngyanglu külemer dang nungi ajizüka benshiba inyakyim ka lir. Hao, tapoktsü (firecrackers) ta ajaba ya mezüng China nung yanglur amshia tenzükba bushiteta lir, saka India nung Hindu nungertem tesangwa benjung- Diwali (Deepavali mesüra Dipavali) nung iba ya kanga bulua amshir aser asenoka parnok jilu ajizüka benschir. Putiotsü bushirtemi Diwali amongba kuli balala nguteta lir saka Hindu nungertemi Diwali ya par tsüngremtem Rama, Sita, Lakshmana aser Hanuman nunger Ayodhya atongba anogo lir ta züngshia amonger. Rama'er sepaitemi Ravana chuba'er sepaitem madak takok anguba aser Rama-i Ravana tepsetba anogo ta amanga Hindu nungertemi Diwali benjung amonger aser iba mapang parnoki tapoktsütem poktepa benjungteper. Iba jilu ajizüka tanü Naga nunger Khristan aikati Khristmas amonger aser "Tesüngiem aonung Yisu aso" ta asüba tiyazü kümdaktsür. Amajok nung sen endokba dang masü saka tapoktsütem apokba ajanga temeket alir nem timtem agütsür, mopung menentsür aser shirang tapu balala adokdaktsür. Anungji, Naga nungertemi iba sobaliba/inakyim ya mebenshitsüla. Asenoki iba sobaliba ya asen loktiliba nung tera meyangdaktsütsüla. Khristmas mapang sen meyrjangsa meyrjang aser karibo lakh temai tapoktsütem alia pokdokba dang nungibo kiyong nung mesüra temeket nung makamaiter nem ang shi khen alia chiang ta ser sen agütsüdi, tapoktsütem alitsü melenabo nungdakbapur ang kar yaridi, tapoktsütem alitsü melena Yisu asoba tepela nung arogo nem ang tenla agütsüdi, tapoktsütem alitsü melena mamanger kar dang ang Yisu asoba tenüng nung ya agiang ta ser sempet agütsüdi. Atangji, Khristmas nung tapoktsütem amshiba sobaliba ya kanga majung aser asen loktiliba den meputep, anungji yaküm tashi koma angateta mongogo ojang, saka taküm nungibo sobaliba tamajungtem mebenshitsü merangdi aser talisa arogotemi anir lokti tentetemia peii akokba tesayubatem aser tenokdangbatem agütsü nung kanga ajungtsü. Yamaji asü nung dang "Temeshi, Tesüngiem, Sentsüprang aonung ka... Yisu aso" ken nung atenba ama asenoki chichiba Khristmas angateta amongtsü.

OLEMSABANG

Arogo nem inyaktsü nungloktsüba tongtipang mapa kar

~ L. Kika Pongener.

(Yashi adok nungi...)

Tanü putu nung nisung karbo yimden yimli temzüng-ozüng küpok melitet, mesura arogo tsüzüng-ozüng küpok meliteti raksar, sadi küli mongutettsüsa jenjang ka sernung, Temeshi kiyimba külizüng aginuba agi...Pei arogo toktsür, tanga tesem kar nungang orr, ani-asüngba aser sadi-külizüngji agitsü lenmang bushitsü akok. Anungji kong/koba tesem nung agidir agiaka, kin/kidong telembuyim asü masü (?)...Loktiliba nung tashishitsü aket nubu asü masü (?) Yimtsüng 'Putu Menden' nungi tejangja küli meshitsüla aser arogotem nungi küli shiti tejangja...Item inyakyim yabo kanga ret-reta mezütoki benschitsüla. Ashiko, ano karbo kin-kidong mejangja, tsürabur mejangja, mesura tim lembuyim masü melembuyim lembuba nisung karibo, item inyakyim ya paitoktsü meji, pei arogo toktsür, tanga tesem kar nungang orr, ani-asüngba aser sadi-külizüngji agitsü lenmang bushitsü akok. Anungji koba tesem nung sudir suaka...Tsüngrem lartemi/arogo tenzükertemi iba inyakyim ya pongpa-pongpa-a mesui kanga ret-reta benschitsüla. Aji oda, iba olen ya Tsüngrem lar aser arogo tenzükertemi memetetba agi parnok sayutsüngir ama mangatetdaktsünür...Saka item inyakyim ya pongpa-pongpa mesui ret-reta inyakdaktsünuba agi nenshia ajungshir.

Ano tanü putu nung karibo kiyimba külizüng agiba sentep sentong ya tenla-kidang masü, tanga tesem Hotel, Resort, Park, Hall etc. kar nungang agir. Hau...tanga tesem nung agibaji tamajung ta ashirba masü...Aser aibelenba-a kecha mali, saka nubur teimba kati tenla kidang agibasa ajak dang tobur tajungtiba aser mera taketba...ta agizüker. (Tenla kidang sadi külizüng sentep sentong agir külen tanga tesem Hotel, Resort, Park, Hall etc. kar nung Reception aser benjong chiyungtsü renemba ajibo kanga junger). Ajisuaka, kiyimba külizüng sentep sentong yabo tenla kidang agiba-jisa kanga agi mera taketba aser taretba ta nubur aikati agizüker. Aji oda, tanga tesem nung agibaji 'Temeshi Mapa' ka inyaker ama masü, saka alima yimya-tentet ka inyaker amai dang, tadeneritem ajak mulongjang nung bilemer. Aji oda, kodang tenla kidang mendir, yimya agi nisung ajaki aketsemtsüa (Coughing) kanga kümdanger aser tenla kidangbo shingai ola adoka, sensak-asema-a, sadok-sadoka mamener, mesura moko-sali achiba, chewing gum mejakba, mapang telatet makai oli-oraba...Yamala ajak azüoka kanga kümdanga amener. Ajisuaka, tanga tesem nungbo, aikati kecha tazüokba ka meli-i sensak-asema sadok-sadoka amener. Anungji, kiyimtsüpur kar koda masü timtem/mokokmin kar agi tenla kidangi motettsüpur atema, pei kidang agitsü lenmang sadem-sadema lapoka yutsütsüla...Iba dakji alaka, tenla kidangi oteter-tembo ajunga kiyimba külizüng sentep sentong yabo tenla kidang agibasa kanga agia tajungba aser metsünga taretba...ta nubur aikati agizüker. (Kiyimba külizüng agiba sentep sentong ya tenla kidang agibasa tajungba...Iba olen ya Biblical & Doctrinal nungi masü, saka kü tangatetba aser nubur taginuba lemsateper dang...ta angateta azüngtsü mepeshir).

Ano tanü putu nung arogotem atema tongpang rara tesashi ka arudagi...Atsü-apong küsa tebur o tebur na aser tetsür o tetsür na kibong akümba...Aser ano alima kar nungbo tanü putu nung tesungmangtsüka...!!! Tebui pei jala den aser tetsüi pei jabaso den aser adianu-aianu kibong akümba...Iba amala ya kopi meli-i arogo nung mela-ang... ta arutsü. Ashiko, yimden bangdak ozüng agibo melaogo...ta arutsü akok. Anungji arogotem kanga kümdanga aser saksalema alitsüba mapang kati menepogo. Ano kanga tekümdangtsü kaji, tanü alima tashitemetet tali-tali renloka aoba agi tamangba yimsu nunga tesayuba tapu balala agi anokshitsütsü, kechiyong tanü putu nung tiyazü tesayuba tapu tapu alima nung adokkogo. Anungji item tiyazü tesayubtem nungi asenoki jenbua alitsüla.

Ano tanü asen lima nunga 'Satanic Church' tenzükba otsü/osangtem angashir, aser ashiko, karibo tenük küli ngur alitsü sudi. Iba 'Satanic Church' yagi lanurtem aika mesuzüka, iba tamangba sulenji anidaka aoba angashir. Ano aji tang masü, tanü asen adenba arogotem nunga tiyazü ainkar aser tiyazü tesayur adoktsü akok. Anungji asenok item tiyazü tesayuba nung metsüktsü asoshi, laishiba kanga nendak-nendaka azüngtsüla aser laishiba den medemdanga amangtsüla...Jokorla, tanü putu nung laishiba ya sayutsüngir aser Tsüngrem lartemi dang azüngtsüba masü, saka tamanger shiai azüngtsüla, aser laishiba den medemdanga amangtsüba mapang kati menepogo. Tsüngrem oi ashir... "Asenok joko tanür ama malitsü, mesura tesayuba mepong shia agi meinzütsü, mesura nisung tekülak sangrasangji agi ina oli aruli ta masütsü" (Efesa-4:14). Anungji arogotem kanga saksalema alitsüla, ajioda, mesura alima temenen nem kokdaktsütsü aser moksepdaktsütsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arizona nung sayutsüngir, Hans Schmidt temang tajungba kümdar



Hans Schmidt'er kibong noksa

Luchii/December 18, 2023: Taoba ita Arizona nung sayutsüngiba mapang nisung kari sayutsüngir ka dak tekolak nung injang khaloktsüba sülen nungi pa hospital-i anir oa tang tashi hospital nung mongdar, ajisüaka pa tema tajungba kümdar.

Lenmang nung sayutsüngia jajar, Hans Schmidt kinüngtsü, Zulya Schmidt-i social media ajanga, "Atangji iba ya sayatonya. Hans-i pa temang tajungba akümtsü atema anogo shia meranga inyaker. Nenok sarasadem amajok masü. Tsüngremi mapa inyakdar, aser item ajak ya Tsüngrem sentsüwangshi atema dang lir. Hans temang tajungba kümdar.

Ano mapang talangka agitsü, ajisüaka kecha masü. Tsüngrem tajung. Yimlibilema maneni onok asoshi sarasademjang," ta mepishia metetdaksü.

"Nenoki aria bilemtsüba, sarasademtsüba aser tenla agütsüba atema pelar. Nenok ajak dang kanga pelar. Tsüngremi mapa inyakdar. Mapang ajak nung Pa onok den lir. Pa sayatonya nung aneptsü ta onoki amanger," ta laisa metetdaksü.

November 15, 2023 nikonngang 6:15 ako meta arrshi küm 26, Hans Schmidt-i lokti aliba tesem ka nung megaphone ka amshia sayutsüngiba mapang nung

nisung kari pa dak injang khalokja liasü. Tang tashi aibelenertemji mapu.

Schmidt ya Victory Chapel First Phoenix nung outreach director inyaker, aser pai mapang shia yimti-yimdong nung sayutsüngia jajar.

Hans aser pa kinüngtsü na tanur ana sosema lir. Tamalen pa sepai nung liasü.

Arogoi maneni pa aser par kibong atema sarasademtsüdar. Bodhbar aonung (December 13) Arogo tekülem sentong nung Pastor, Gary Marsh-i, Schmidt temang tajungba kümdar, ajisüaka kanga junga aneptsü atema ano mapang agitsü, ta metetdakja liasü.

Myanmar nung sepaitemi Tenla ki 74 raksatsüogo: BHRN

Luchii/December 18, 2023: 2021 küm February ita nungi tenzüka tang tashi nung Myanmar nung sepaitemi Tenla ki 74 raksatsüogo aser Khristan 42 puogo, ta tawa Burma Human Rights Network (BHRN)-i metetdaksü.

Tang Myanmar nung democracy pusemertem aser lisopur telok balala longjemer - Brotherhood Alliance kübok sepaitem anema rarar; sepaitem yimsüsüba atsüngdoksüsa aliba mapang ka nung BHRN-i iba osang ya metetdaksü.

BHRN-isa taoba ita (November) Myanmar sepaitemi Latpan Chaung yimdak Seventh Day Adventist Arogo Tenla ki ka amakba aser Kayaah State yimtiba, Loikaw nung Tenla ki ka atsünga agiba densema Khristantem anema inyakba tataloka balala osang metetdaksü.

BHRN nung meimchir temeden atema inyakba tentet

aika densema lir, aser parnoki mapang shia linük nung meimchir temeden anema inyakba tatalokbatem osang metetdaksür.

Myanmar nung Arogoi maneni tesem balala nung jenshia aliba tanurtem nem chiyungtsü aser shisaliok agüja yaridar; Arogoisa ajak dang item ama tanurtem yaritsü ayongzüko.

Myanmar kübok Mawlamyine nung tongti putir, Maurice Nyunt Wai-i, par Arogoi maneni tanurtem nem chiyungtsü aser shisaliok agüja yaritsü, ta metetdaksü.

St. Mary of Assumption Arogoi tanur 700 dak tema jenokdakja yaridar. Ano tanga Arogo 14 nunga tanur noklang aika yaria anepaludar.

Myanmar kübok state balala nung sepaitem aser lisopur teloktem tsüngda rara ajanga Khristantem teimba ser kibong aika jenshia lir.

Thailand nung amenoka aliba Institute for Strategy & Policy-i ashiba agi, taküm

January ita nungi June ita tashi nung linük telung nung nisung 680,000 jenshiogo.

2021 küm sepaitemi tashiyim amshia democracy sorkar atsüngdokba sülen nungi tenzüka linük telung nung nisung million 2.6 dak tema tesem balala nung jenshia lir.

Tawa UN Under-Secretary-General for Humanitarian Affairs & Emergency Relief Coordinator, Martin Griffiths-i anogo asemnü Myanmar semdanga liasü. Iba mapang nungji pai Myanmar nung million 18 yaritsü atema maneni teyari agüjang, ta ayongzüka liasü.

"Iba linük nungji maneni raraba agi nütsüng shilem asemsü nungi shilem katibo teyari balala nungdaka lir," ta shia Griffiths-i Myanmar nung yimtenren lenirtem aser alima nung lenirtem dang maneni Myanmar nung teyari nungdakbapurtem yaritsü ayongzüok.

ANO GO ABEN TSÜNGREM DEN

Anogo shia taküm

Rom 10: 1-17

Anungji tamangbaji tangashiba nungi arur, aser tangashibaji Khrista O nungi arur. Rom 10:17.

Anogo shia taküm aritepa aliba mapang alima mazüngi mapa inyakba tiyalung nung tesüngjem teshisadangba mapang asenoki nungdaker. Yisu den telungjem akatsü asenoki iba tesüngjem teshisadangba mapangji nungdaker. Asenok asoshi Tsüngrem O nung ali aser Tanela Temeshi-i anidaktsübaji tajung.

Tsüngrem O ajanga Tanela Temeshi-i asenok mulungjang nung mapa inyaker ta Pauli ashir. Asenok tamang nung aintsü aser temenen tatok angutsü aser taküm tesünep nung alitsü asoshi asenok ain tenüngdaksü.

Na temenen sapuba ajanga timtemdaksür asü? Aiben asenoki asen yimya tamajung nung pudaktsür aser asüakümer. Miim o belenshiba aser merumeru shisatsü agi asenok timtemdaksür. Aiben asenok mit mazüokteter. Ne mulungsentsü agi na tsübudaktsür asü? Na ki menungrar asü? Anitsü tsübuba agi na atentendaktsür asü? Süra Yisu aser Pa O nung angang. Yisuji asenok teti taküm aser teti temeim Kibur asenok jenokdak aser tashi lir. Yisui asenok den O ajanga jembir aser asenok tepiyong tanüker. Asenoki temenen tatok asoshi aser tatem maka tekümtet asoshi Pa dak amanger. Asenoki Pai ashiba angashir: "Shirnoki Tsüngrem O angashir aser tashi anger temoatsü" (Lk. 11:28). Iba O ajanga tamang arur.

Kotaker Oba, iba teshisadangba mapang asoshi onoki Ne tenüng asanger. Ne osangtajung asoshi onoki Ne tenüng asanger. Amen.

Release Intl'-i India sorkar dang anti-conversion ozüng agientsü mepishir

December 18, 2023: India kübok state balala nung anti-conversion ozüng kübok Khristantem densema nütsüng ajema alirtem anema inyakba kanga bulua atalokba atema aikati teblemtsü kaa India dang linük nung yimsü temeden kümzüksü mepishir.

Khristan melungtet telok-Release International-ia India sorkar dang India nung state 28 nungi state 12 nung benoka aliba ozüng tesashi- anti-conversion ozüngtem agienang, ta mepishiogo.

Küm asem tejaklen Uttar Pradesh nung anti-conversion ozüng agizükba sülen state nung Protestant pastor aser Protestant Khristantem teimba ser Khristan 398 puogo.

Taoba ita (November) tatembanglena Uttar Pradesh nung pastor 27 densema Khristan 42 pua anir aoba sülen asüngdangyaba osang lir.

Release International-i, anti conversion ozüngtemji kangshia tamangba yimsü meyipdaksüba nokdangtsü nükjidong nung benok, ajisüaka atangji nungbo iba ozüng ajanga pei yimsü tangar den lemsateptsü atema Khristantem nokdang, ta metetdaksü.

Release International CEO, Paul Robinson-i, anti conversion ozüngtem ajanga tiyazü nung tai tonglokja pastor

tem aika puogo, aser tetsür-tanurtem tekülem kidangi aoba sülen kidangi meyipa aodang amokmerenba osangtem lir, ta metetdaksü.

"Ano tatalokba kar nungbo pastor tem aika dak azük aser karbo tepsetogo," ta Paul-i ashi.

"Sangküm India nung General Elections agitsü mapang ana nung lia Manipur state nung Khristantem anema inyakba tatalokba aika lir. Tang ama dang ora India nung Khristantem reshikangshiba jenjang ano tamajungba akümtsü," ta Paul Robinson-isa metetdaksü.

"Küm ka nungi ka ta onok partners-i India nung Khristantem reshikangshiba tatalokbatem teimba-teimba dang akümba osang metetdaksü," ta paisa metetdaksü.

Joko azü tokshiba anentsü atema India sorkari anti-conversion ozüngtem ya agientsüla, ta pai ashi.

"Alima nung democracy tulutiba linük ya maremzüktetba society ka akümba onoki kuli süa angur," ta pai ashi.

"Release International-i India sorkar dang minority yimsü amangertem anema inyakba sobaliba prokba ya nokdangtsü atema inyaktsü aser anti-conversion ozüngtem agientsü mepishir," ta paisa metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Shili

(n) temang nung shi talila adokba (wen)

* Okola dak tenukong nung shili tuluka adoka lir.

Shilong

(n) shimelang, shi telong ka (a piece of meat)

* Kütsüi kü auso nung shilong tuluka enoktsü.

OLONG PAITEP # 6648

Grid for OLONG PAITEP # 6648 with numbers 1-15 in various cells.

TIPIEN

- 2. Si jeplok - (4)
4. O agi merenshi - (9)
7. Ayongküm Li - (9)
8. Chiyungtsümapang sülabk - (4)
9. Tsüngzem den jerbibba - (9)
12. Saklok - (4)
14. Saraba rebushitet - (9)
15. Mejanga onü - (9)
16. Tzü shinuu ka - (4)

LANGTSÜNGLEN

- 1. i - (4)
3. Kasa masü - (9)
5. Nüchi masü - (9)
6. Tashi endk - (9)
9. Langtem - (9)
10. Anümalidang - (9)
11. kibur - (9)
13. Tebur tarbar tsüngca jatetpa - (4)

OLONG PAITEP # 6647 TELANGZÜBA

TIPIEN :

- 1. Semtu, 3. Lepko, 5. Bilem,
8. Ulu, 10. Tsüngpang,
11. Tesangwa, 13. Aoksa,
15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI - A YA METETER MA



Prime Minister Narendra Modi-i December 17, 2023 nü Surat Diamond Bourse (SDB) lapoktsüba angur. SDB ya international diamond & jewellery business atema centre tulutiba den alima nung largest office complex lir. SDB ya Diamond Research and Mercantile (DREAM) City nung shilem ka lir aser taoba Gujarat chief minister Anandiben Patel-i February 2015 nung lung azüngtsü. SDB ya ali acre 35.54 nung Rs 3400 crore endoka yangluogo.

AAPSU-i Yumsem Matey tepsetba aitsür Sorkar dang NSCN anema mapa inyaktsü akhanger

Itanagar, December 18, 2023 (Agencies): Tirap district nung MLA candidate Yumsem Matey tepsetba atema All Arunachal Pradesh Students Union (AAPSU)-i tanü Chief Minister Pema Khandu dangi memorandum ka züluogo.

"Iba ya political murder ka lir aser Myanmar den arntsütepa aliba Tirap Changlang aser Longding district tem nungi MLA tem dena lir" ta AAPSU General Secretary Ritum Tali-i ashi.

India sorkari National Socialist Council of Nagaland (NSCN) den tesentaktep aliba

candidate tem disqualify asütsü ayongzükogo.

"Burma nungi telungpurtemi timtem agütsüba noktangtsü atema international border shibangtsüla. Sorkari ola madok malitsüla saka ozüng alema inyaksangshiba azüoktsüla" ta AAPSU-isa ashi.

NSCN-i tashiyim agi sen sarur aser ibaji talisa Tirap nung sorkar mapa inyakertem dang meshir. Iba tatalokba ya National Investigation Agency (NIA) aser Criminal Investigation Department (CID) nem bushisüngdang sädaktsütsüla, ta AAPSU-isa

takhangba agütsü.

"Onoki Chief Minister nem memorandum ka agütsüogo aser onoki temeten meshir. Ozüng alema inyaksangshiba ken o alirt MLA tem sorkari anentsütsüla. TCL (Tirap, Changlang, Longding) region nung tensa azüoktsüla" ta parnokisa metetdaksü.

AAPSU-isa December 22 nü rally ka agütsü aser iba ya TCL region nung security akangshitsü, NSCN-i pua alirtem chioktsü takhangba agütsüba den tashiyim inyakba den nisung tepsetba aitsütsü.

Meitei Leepun tanishir Pramot Singh anema FIR benok

Imphal, December 18, 2023 (Agencies): Meitei Leepun tanishir Pramot Singh-i yimjak nung injang khatokba atema ken o ka benokogo.

Meitei Leepun tanishir Pramot-i Imphal nung ali mangatettep atema injang khatokba sülen tensa mejungi aküm aser iba nung ajemdaker Porompat Police-i pa anema FIR ka benokogo.

Pramot Singh-i injang khatokba video ka taoba BJP MP HS Benjamin Mate-i lemsatetpa liasü.

Imphal nung Manipuri temple ka ali atsünga agir ta tai tonglokba Pramot-i non-Manipuri kar den raratepdang iba ya atalok.

"Meitei Leepun tanishir Pramot Singh aser Meitei armed militia Arambai Tenggol nungeri Imphal nung aliba

India nunger dak injang khaloktsür. Iba mapang Manipur Police liasü aser CCTV cameras nung menüngoka lir. Biren Singh'er Imphal nung shinga kümzüka mali ama bilemer" ta HS Benjamin Mate-i ashi.

Taküm May ita nungi Manipur nung mepetmesü adokba sülen Pramot Singh ya ashishitep aketba nisung ka ama arur. Taküm November nung mejangjaba nisungtemi Pramot khasettsü merang saka tamakok angu.

Iba ya masü dang October ita Churachandpur district nung Judicial Magistrate-i Pramot Singh anema non-bailable warrant ka agüja liasü. Iba ya pai osangbener den sensaksemdang kin anema jembiba atema benok saka

police-i pa pua maru.

Pramot Singh-i Meitei nunger pusema jembir aser inyaksangshir. Taküm July ita osangbener den jembidang CM Biren Singh mapa nungi anentsüra India sorkari Meitei nunger dang Kuki nunger puseba sayutsü ta pai shia liasü.

Meitei nungeri President's Rule anema noktaksü kechiyong iba ya Kuki nungeri akhangba lir ta Pramot-isa ashi.

Kuki nungeri parnok alinük balala akümtsü mapa nung narco terrorism amshir. Ozüng alema arurtem Khristan yimsü agizüker aser iba nung missionary tem dena lir ta Pramot-isa metetdaksü.

Meitei Leepun-i Kuki nunger anema inyaker ta asüba ya Pramot-i magizüker.

Manipur nung taoba ASP Thounaojam Brinda'er raksatsü

Imphal, December 18, 2023 (Agencies): Imphal West kübok Yaiskul nung nisung telok kati Manipur ASP Thounaojam Brinda'er kima adenshia timtem agütsü.

Nisung telok ka tejashi nung Brinda'er kima nung adenshi. Torbung United Club (TUC)-i Manipur nung taoba ASP Brinda dang asüng anüngdang 12:00 ako tashi nung yimjak nung tatok meshitsü takhangba agütsüogo.

Arambai Tenggol-i May 3 nü Torbung Gram Panchayat kübok Meitei nungeri toktsür aoba kitem mi ai rongdoktsü ta Brinda-i tai tongloktsü.

Brinda-i nisung ka den jembidang Arambai Tenggol

dak tai tonglokja lir aser parnok ya Chief Minister N Biren den sendaktepa private militias ta shia lir.

Iba audio clip ya koba anogo aser koba mapang jembibar memetet.

Torbung Bangla nung alirtemi tejashi nung Brinda dang anogo ananü tsüngda tatok meshitsü takhangba agütsüogo.

Parnoki la dang yimjak nung tatok meshitsü shiogo aser iba atema asüng anüngdang 12:00 ako tashi mapang lazüktsüogo. Iba ya meinyakra Brinda-i lar ki toktsür aotsü shiogo.

Ajisüaka tang tashi Brinda-i tatok mememshi mesüra lai jembiba olen meyipa magi lir.



GOVERNMENT OF NAGALAND

DIRECTORATE OF HEALTH & FAMILY WELFARE REQUEST FOR EXPRESSION OF INTEREST

REOI No: DHFW-8/33/JICA/2013-14(Pt)/ 4882

Dt. 18th Dec 2023

The Directorate of Health & Family Welfare, Government of Nagaland invites expressions of interest from eligible Consultancy firms ("Consultants") to indicate their interest in providing consultancy services for the "Project for the Establishment of Medical College Hospital at Nagaland Institute of Medical Sciences and Research, Kohima" under JICA ODA Loan.

Last date for submission of the proposal: 12th January 2024 by 16:00 Hrs

Details are available at: www.nagahealth.nagaland.gov.in

The response must be emailed with all necessary forms and documents to nagahfw.JICA@gmail.com

All interested parties to keep themselves updated on any addendums through this website. No further newspaper advertisements will be published.

Jabalia nung tayimtsü amshia amak, nisung asür 110 jungogo



Gaza Strip north tsütsü Jabaliya refugee camp nung Israel nungeri tayimtsü amshia amakba sülen ki teraksa ka nungi ngutetba tanur tasü ka Palestine nunger kati bener aoba noksa nung angur.

Gaza City, Luchii/December 18 (Agencies): Gaza north tsütsü Jabalia nung Israel-i tayimtsü amshia amakba nung nisung asüba 110 jungogo, ta Hamas ketdangsür temi ashir.

Deobarnü tayimtsü amshia nisung aliba tesem ka nung amakdang nisung aika tepset aser 50 shi ki o jen teraksa aser longsang agi nembanga lir, ta Hamas ketdangsür temi ashir.

Israel mitkari Jabalia nung tayimtsü amshia amakba mashi saka yangji kiralongrar temi amshiba tesem kar nung tenük yoker operation agir ta ashir.

IDF ajanga sangdong ka nung ashiba agi, yangji operation agidang Hamas kiralongrar lenir ka ki telung nung maparen balala inyaktsü atema Israel nunger sen 5,000,000 (£1.1m) ngutet.

Kiralongrar indang ki o jen amak, kong tapoktsü oset aser mitkar indang hadir densema nok-nü yua liasü aser par sepaitemi "terror tunnel shafts"

ka raksatsü ta ashir. IDF ajangasa Gaza south tsütsü Khan Younis nunga "suspicious terrorist cell" ka samatsü aser anüing aser tzüyim nungi danga operations agir ta ashir.

Yasüing Jabalia refugee camp nung aliba ki asem nung Israel nunger missiles pezü khaloktsü, ta tenük kuli alir aser osangbener kari ashir.

Gaza north tsütsü Jabalia ya camp tulutiba lir aser Israel mitkar temi iba camp temeket nung tesüiba hopta ana tashi operation agia arua liasü.

Tanks kar camp nungi ainshioigo saka aonung tayimtsü amshia amakba tali kumogo.

Gaza nung Palestine nunger refugee camp ti aliba rongnung Jabalia ya tulutiba lir. Iba ya 1948-49 Arab-Israeli rara sülen amenok aser yangji refugee 116,000 alir ta UN nung tenüing züluoka lir.

IDF-i iba camp ya Hamas asoshi tesep tuluka ama

züngshir aser Israel sepaitemi alilen nungi iba tesem nung rangloker maka liasü.

Israel mitkari tayimtsü amshia Jabalia camp nung October 31 aser November 1 nü amakdang nisung 195 tepsetogo, ta Hamas meyong sorkari ashir. IDF-i yangji Hamas tanishirtem dak tenük yoker amak aser tepset ta ashir.

US Defense Secretary Lloyd Austin Hombarnü Israel tonga aruogo aser pai Israel Defense Minister Yoav Gallant aser Ato Kilonser Benjamin Netanyahu den senden amentsü lir.

October 7 nü Hamas teloki arütsü alema aita Israel nunger nisung 1,200 shi tepsetba den nisung 240 shi pua bener aoba sülen tayang kepzüka Israel-i Gaza amakba nung Palestine nunger nisung 19,000 jungnüa tepsetogo aser yangji tila tanur 8,000 jungnüa lir. Kasa mapang Gaza nung nisung 50,000 dak tema yirua lir.

North Korea-i mejangjaba ballistic missile ka tendang: Seoul

Seoul, Luchii/December 18 (Agencies): North Korea-i Hombarnü ballistic missile ka tendangogo, ta South Korean military-i metetdaksü. Deobar aonunga North-i short-range missile ka tendanga liasü.

Seoul aser Washington nati, Pyongyang-i United States aser South Korea na nuclear amshia makra North Korea yimsüsüba tembangtsü, ta tekümdangtsü metetdaksüba sülen tang missile ana ya tendangogo.

"North Korea-i mejangjaba ballistic missile ka linük anütoklen tzüyim leni khaketa yokogo," ta Seoul indang Joint Chiefs of Staff-i Hombarnü anepdang ashir.

Japan sorkaria X sabang ajanga North Korea-i ballistic missile asütsü ta bilemba missile ka tendangogo, ta metetdaksü saka iba dak sendakba nung osang talila

magütsü. Deobar aonung menor Pyongyang len nungi short-range ballistic missile ka tendangba metetogo, ta South-i ashiba sülen Hombarnü anepdang iba missile tendanga liasü.

Missile ya km 570 shi yima orr anütoklen tzüyim nung tsük, ta JCS-i ashiba den Seoul, Washington aser Tokyo-i North Korea-i ballistic missile tendangba dak sendakba nung osang lemsatepogo, ta shisem.

United States aser South Korea na Hokolbarnü Washington nung tanabuba Nuclear Consultative Group senden menogo, kong North den mangatetep adokra nuclear amshiba koda nokdangtsü iba indang sensaksema liasü.

US aser South nati taruba küm nuclear operation drill ka densema military exercise

atsülangshitsü atema sentong yangluba North Korea defence ministry otongdar kati Deobarnü aitsüogo.

OFFICE OF THE
MERANGKONG SENSO TELONGJEM TULI
P.O. Tuli Town - 798618
Dist. Mokokchung : Nagaland.

TENÜNGSANG AGÜTSÜR

Merangkong Senso
Telongjem Tuli ajanga
Wb.IMTISANGYU, Wb.
Longrichiba Jamir aser Wt.
Marmenla Imsonger jabaso
NPSC/CTSE (Engineering
Services) Tatidang 2023 nung
Junior Engineer menden
ngutetba asoshi tenüngsang
agütsür.



Merangkong Senso
Telongjem Tuli, ajanga maneni
tarutsü nung Pa taküm aser
semper nüburtem asoshi temoatsü
südakjang da sarasadema atar.

Sd/- **Sd/-**
IMKUMZUKBA **MOASASHI**
Tir Tongti Zülur
Merangkong Senso Telongjem Tuli

KIBONG KUMER KÜM 60 AJUNGBA TEPELA SALEM

Obu K. Imotemjen Aier aser Otsü Arenmongla Jamir



Küm 60 jaddang tanü, December 19 nü ajurutepba temeim obu aser otsü. Onoki rangloksü, shisatsü agi onok anitsü, yimya tajungtem sayutsü aser nenoki ajangshibatem lemsateptsü asoshi nena moatsüba atema Tsüngrem dang onoki pelar. Onok asoshi temoatsü tulutibaji nena lir. Tajung Tsüngremi maneni nena madak Pa temoatsü aser temeim teti lidakjang ta onoki sarasademsür.

*"Age comes with wisdom,
All your experiences are made known
To us with your stories of God's kingdom,
Never to us forgotten, even after we have grown."*

-Kaden Aier
Temeim aser sarasadema,
~ Semchir, chirnung aser anük-apang

Northeastern Australia tzümetsüing agi kanga mejungi kongshir lir

Canberra, Luchii/December 18 (Agencies): Northeastern Australia tzümetsüing agi kanga mejungi konshiba sülen iba tesem den tesendaktep maka kümogo aser nüburtem tzü metsünga atuba nungi jenbotsü atema kilem nung jenoka liasü. Manger mesangwa tsüingda Queensland nung nisung 300 dak tema teküzmükdak bushia anirogo aser tzümetsüing agi kongshir aliba tesemtem nem teyari agütsütsü atema military helicopter tem yokogo, ta ketdangsürtemi Hombarnü metetdaksü. (Maneni tapak 8 nung...)



Alima tesem ajanga nung tango sashiba timtem tali akumba aser JN.1 Covid-19 sub-variant tasen poktetba mechi World Health Organisation (WHO) ajanga tekum dangtsü shiogo. Virus ya melenshia tesashiba akumer, anungji züngsem linüktemi kanga junga meita reprangtsüla ta WHO ajanga ashir.

Wokha Dist. Hon jubilee nungdem nung half-marathon aser walkathon asaya



Dimapur, Luchii/December 18 (TYO): Wokha District kumteter kum 50 ajungba nungdem nung Wokha District Sports Council (WDSA) aser Golden Jubilee organizing Committee na longjemer December 18 nu asayaner ajak atema Half-Marathon aser tintet rogote atema Walkathon ka ayongzuka asayaogo. Iba sentong ya "Run for Renewal and Transformation" omen nung ajemdaker agia liasü.

Half marathon asemtepa ya MLA Y. Mhonbemo Humtsoe-i nongita yari aser Department of Youth Resources and sports-i sponsor süa liasü.

Deputy Commissioner & Chairman WDSA, Ajit Kumar Ranjan IAS-i half marathon ya

Wokha Zero-Point nungi tenzüksü aser Public Ground nung tembanga liasü. Kasa mapang nung tintet rogote atema walkathon ya PWD Junction nung tenzük aser public ground nung tembanga liasü.

Sentong tatsüka agiba mapang Dr. Atheo Murry-i fitness & health onük nung ajemdaker jemi aser fitness trainer Khriesinuo Ngacu-i fitness atema tasa kar sayua liasü.

Taoba mapang MLA aser Lotha Hoho mendenbuba Mhao Humtsoe-ia iba sentong nung shilem agi aser jenjang balala nung takok angurtem nem sempet agüja liasü.

DSO & YRSO Wokha, Libemo Jami-i lokti pela

agizükba o jembiba mapang takok angurtem aser shilem agir ajak nem tenüngsang agütsü aser iba sentong nongita yarirtem ajak dang kanga pelaba lemsatepa liasü.

Half Marathon tebur asemtepa ya Phyobenthung Humtsoe-i akok aser tanabuba aser tasembuba jenjang nung Renthungo Tsanglao aser Chonben Tungoe na liasü. Tetsür category nung Chonben Tungoe mezüngbuba jenjang nung liasü aser Yingabeni Odyuo aser Lichumbeni Kikon na tanabuba aser tasembuba jenjang nung liasü.

Tintet rogo category ya Yanbemo Nullie-i akok aser Khoshako Erie o Yanpothung Jungio na tanabuba aser tasembuba liasü.

Pak den Davis Cup atema India team sangdongogo

Luchii/December 18, 2023 (Agencies): Pakistan den Davis Cup asayatsü aliba atema züngsem pongu agi kumtetba India team Deobarnü sangdongba nung Ramkumar Ramanathan-a züngoksemogo. Iba ajanga kum 60 sülen India team tang mezüngbuba Pakistan nung oa asayatsü asoshi renemba sayur.

Security dak sendakba nung AITA-i ITF dang Pakistan nung oa masayatsü atema temepeshiba ka agütsür tang osang ataba mapang ka lir.

India team tatembangsa 1964 kum Pakistan nung oa asaya aser parnoki asaya 4-0 agi koka liasü. Davis Cup nung linük ana tang tashi nung tiben asaya lir aser asaya ajak India-i koka lir.

Ramkumar lenisüba nung India team asayatsü, kong N Sriram Balaji, Yuki Bhambri, Niki Poonacha aser Saketh Myneni nung densema lir. Iba asaya ya World Group I play-off tie nung shilem ka ama February 3 aser 4 nu asayatsü.

Team nung Ramkumar aser 2019 national champion dang kija asaya nung shilem agir aser tanungba asayar asem ya



Ramkumar Ramanathan

ATP Tour nung tarep asaya nung dang shilem agir.

Captain Rohit Rajpal-i Bhambri dang kija asaya asayatsü asoshi asüngdangtsü akok. Maneni Balaji danga kija asaya asayatsü asoshi asüngdangtsü akok.

Digvijay Pratap Singh shiba September ita Lucknow nung Morocco den India team Davis Cup asayaba mapang mezüng asaya liasü, pa reserve player ama shimogo.

India nung rongnungi temaba jenjang nung aliba asayar Sumit Nagal aser Sasikumar Mukund na iba asayamung nung shilem magitsü.

Kasa mapang nung India-i

ITF dang linük ana tsüngda asaya ya neutral venue ka nung asayatsü atema mepeshia asüngdangogo, saka ITF Davis Cup Committee-i magizük.

"Davis Cup committee-i telemtetba agiba dak sendakba nung onoki temepeshiba ka agütsüogo aser ITF tribunal-i December 19 nu tatembangbuba telemtetba agitsü. Tribunal-i onok temepeshiba magizükra onok Pakistan-i oa asayatsü," ta AITA Secretary General Anil Dhupar-i ashi.

2019 kuma India team Pakistan nung oa asayatsü ata, saka AITA-i mepeshiba sülen ITF-i iba asaya ya Kazakshanti belener otsü.

AITA-i Pakistan nung oa masayatsü atema telemtetba agiba atema Pakistan nung asayar tajungtemi iba asaya nung shilem magitsü atema telemtetba agi. Iba sülen Pakistan-i asayar tasentem yoka liasü.

ITF-i ano neutral venue kati asaya belener aotsü telemtetba agira Pakistan Tennis Federation (PTF)-i parnok indang team meyoktsü ta shiatokogo.

Para-Badminton: Joshi-i Gold; Pramod-i silver 2 angu



Manasi Joshi

Pramod Bhagat

Luchii/December 18, 2023 (Agencies): 5buba Fazza Dubai Para Badminton International 2023 nung World Para-Badminton ranking nung tanabuba jenjang nung aliba tarep Manasi Joshi aser Thulasimathi Murugesan nati tetsür tarep SI3-SU5 category nung gold angu aser Para Asian gold medalist Pramod Bhagat-i, silver medal ana ngua liasü.

Joshi aser Murugesan nati final nung Indonesia nung tarep Leani Ratri Oktilla aser Khalimatus Sadiyah na 15-21, 21-14 & 21-6 agi koka liasü. Deobarnü India nung final asaya trok nung asaya saka tenatidang gold medal ngua liasü.

Tebur kija SL 3 category final nung Pramod-i England nung asayar Daniel Bethell mekoki liasü. Asaya nung toktepa asaya ajisüaka

England nung asayar yagi tesüngjemba asayateta asaya 21-17, 21-18 agi koka liasü.

Tarep temeyoktepa asaya SL3 aser SU 5 category nung Pramod aser Manisha Ramdassc na Indonesia nung tarep Hikmat Ramdani aser Leani Ratri Oktilla nati 21-14 aser 21-11 agi koka liasü.

Tarep temeyoktepa asaya SL 3 aser SU 5 nunga Kumar Nitesh aser Thulasimathi Murugesan nati bronze medal nguogo.

Tebur kija asaya SL 4 category nung Suhas Yathiraj-i silver medal angu aser Sukant Kadama o Tarun nati bronze angu. Tetsür kija asaya SL4 category nung Palak Kohli-ia bronze medal nguogo.

Tebur tarep asaya SL 3-SL4 category nung Manoj Sarkar aser pa indang Korea nung partner Cho Nadan nati silver angu aser Kumar Nitesh o Tarun nati bronze ngua liasü.

Northeastern Australia... (Tapak 7 nungi...)

Alima penzürtemi kanga sapua semdangba Cairns tesem tzümetsüng agi tesendaktep makai kumogo aser jila nung alir nisung 160,000 yakta tajemtsü tzu agi anünga akümstsü ta tsüba bilemer.

Local ketdangsurtemi ashiba agi, iba jila nung Hombar anepdang tashi nung taoba ghonda 40 tsüngda tzünglu 600mm shi aru, koba December ita yimya agi tzünglu aruba dang nungi asemben agi timba liasü.

Cairns Airport-i aoba tayimtsü ajak thitsüogo, kechiyong airport ya tzu agi metsüngogo.

Kasa mapang nung iba tesem nung ki 14,000 dak tema nung electricity maka kumogo, ta ketdangsurtemi ashi.

Cape York region kübok Wujal Wujal tesem nung arishi kum tenet tain tebur chanu ka densema nisung teku tashi mozüki ka kilem nung jenoker liasü.

Maneni Wujal Wujal aser

Ingham densema tesem aika nung tzürang tzu wa aliba nguogo, ta osang ajangsa metetdaksü.

Taoba hopta Tropical Cyclone Jasper-i Australia dak kongshiba sülen tzünglu kanga sashia aruba ajanga tang tzümetsüng adoker lir.

Queensland state Premier Steven Miles-i ashiba agi, iba tzümetsüng lendong ya tang tashi nung pai ajangshia aruba rongnung lendong tesashitiba lir.

"Tebilemstüji tzülung aruba manener aser tzünglu aru manen tashi kinük nung aliba tesemtemi tayimtsü ajanga teyari magütsütettsü," ta Miles-i Australian Broadcasting Corporation dang ashi.

Queensland Treasurer Cameron Dick-ia, iba tzümetsüng ajanga billion dollar aika akoksatsü, ta ashi.

Ato Kilonser Anthony Albanese-i ashiba agi, tekümzükba maparen balala inyaksü atema Australia military renema tokja lir.

BILEMDANGANG

"Nisungkaji pei akaba agi masü saka pa/la yimya agi jangjar."